



# Huset som talar

*Av Jan-Magnus Bruheim*

I det forletne skulehuset  
langt mot vest,  
der kan du tru det lever mangt!  
Det knett og knest

når lynet gneistrar  
gjennom natta,  
stormen riv,  
når regnet skvalar  
og når røket driv –

Når sjøen bæreblunkar,  
ligg der still og glitrar  
og sjøfugl skrik  
og småfugl kved og kvitrar

og sola skin  
og milde vindar svalar,  
då kan du sitja her  
og høyre huset talar!

Om du sit draumestill  
og lyder vèl,  
du høyror at det  
talar og fortel.

Det står og minnest  
alt som var ein gong,  
og kallar fram att  
leik og lått og song.

Ein ôm av røyster –  
Lette barnesteg.  
Dei opnar dører  
og kjem inn til deg.

Du høyror borna  
leikar seg og spring.  
Men når du så skal sjå-til,  
ser du ingen ting.

Rart vart det visst her  
då dei siste fór.  
Men huset står åleine att  
og gøymer spor – –

Tru kvar dei vart av, alle?  
Dei fór kvar si lei.  
Lell er det som om noko  
er att her etter dei.